

黑山縣志第十三卷

人物志下卷

一、孝子

胡連陞 縣北五台子人性至孝三歲失怙與母相依維命家極貧年十三即傭於人任苦役得資奉母時感仰事不足之憂中勞資收入稍豐遂忖母所好而備致之凡飲食服御必足母意而後已雖富家孝養不足過也終其母之世承歡養志不稍怠而自奉儉約刻苦逾恒故人皆以孝子稱之

張玉堂 縣北二台子人性至孝生事盡禮母沒廬墓三年孝思不置民國政府曾頒匾額以旌其閭滿洲建國復蒙頒賜表彰狀及匾額各一用彰厥孝以式來茲

劉保泰 字中和縣城人母早逝事繼母至孝父沒廬墓三年清廷頒賜孝道可風匾額一方以旌其門庚子亂後獨立創立宣講堂一所以五常八德爲講演資料大聲疾呼晝

夜弗懈其中於中下社會人心者至深且溥並立過路宿舍一所施捨粥飯救濟來往行人者至數年之久復蒙民國政府以周濟窮乏匾額褒揚之因此地方官民不僅頌揚其孝且均稱爲劉善人云

張瑞典 字從周縣北羅家台人生有至性事親盡孝母沒廬墓三年聲聞於上旌表孝子並頒匾額獎章各事以寵榮之

龔玉長 縣南高山子人家貧無妻獨立自給僅有斗室以與老母相依維命天性至孝每日傭工所得之資必市肉麵製餌餅以食其母冬溫夏清無或稍疎母故哀痛欲死所遺褥被夜猶虛設於母之寢處而巳不忍鋪蓋也因其孝行可嘉政府特予褒揚云人子董玉樹 縣東么路子人事親至孝母自六十歲時常患胃疼病飲食起居需人服侍玉樹則一身任之雖有諸婦兒孫屏而不用現在其母已八旬有六矣患病二十餘年未嘗使母稍感病苦康德七年政府旌以孝子宜也

黃弼臣 縣北朝北營子人生性純厚篤於事親宗族鄉黨咸稱道之事聞於上遂蒙政

府褒揚云

二、節婦

吳氏 郭廷奎妻年十七于歸未三載而寡或勸改醮矢志不從因選宗侄爲嗣日以孝事翁姑延緒宗祧爲堅固不拔之志守節五十餘年卒年六十八歲道光九年得蒙旌表以彰其節

王氏 按察司昭磨賈俸之妻縣東北碯子山人以道光二十四年夫故守孀當年二十九歲矢志栢舟事老撫幼人無間言守節三十餘年而卒光緒二年得蒙旌表入節婦祠現有石坊高聳以旌其閭

李氏 張文妻適張三載而寡時年二十一歲家貧如洗矢志靡他事公姑以孝聞生養死葬氏皆隻身任之卒年七十有二光緒十四年奉旨旌表

張氏 縣城魏閭峯妻十七歲于歸二十九歲而寡事親以孝教子有方初家極貧嗣

以子能克家孫能勵學終張氏之世不僅家道豐盈且已家聲丕振矣其守節五十餘年壽享八十三歲而卒光緒三十一年援例請旌於朝奉旨准予立碑建坊入節孝祠以示旌表其生平節畧載入本志金石門張氏墓碑茲不贅叙

任氏 邑庠生周仁爵妻夫故異鄉氏携子扶柩歸葬甫至家子旋亡遺孫正在襁褓中氏以中年猝抱夫故子亡之痛而夫弟錫爵復故去遺妻許氏生二子均幼稚一家數口孤者孤寡者寡似此人生有何希望而任許二氏自認命薄矢志靡他既感同病相憐各以撫孤成人爲目的從此妯娌二人同辛共苦各守婦節三十餘年而終達其所期志願光緒三十一年奉旨旌表

曹氏 郭文藻妻十七歲于歸一載即寡矢志不離夫弟文翰尙幼氏以紡績佐其讀書卒至成立守節四十餘年光緒三十三年經御史錦州朱顯廷奏請旌表

王姚氏 縣城王成之妻年二十六夫因助兵擊死於馬蹇子一役（見本志耆舊門）氏即撫孤守節矢志不移厥後二子一讀一耕名成業就人謂義士之後又有節婦以成

之所謂相得益彰矣光緒三十二年奉旨旌表准予建坊勒碑懸額以寵榮之
惠張氏 縣北新立屯鎮惠成林之妻十九歲于歸二十三歲夫故無嗣氏則矢志守節
至四十年之久有清末集奉旨旌表節孝准予懸額建坊入祠以旌異之現有石坊一座
尙巍然於新立屯鎮東門外

邢蔣氏 老鸛窩邢玉懷之妻夫故守節清宣統二年旌表建坊入祠

孫襲氏 新立屯孫奎之妻夫故守節清宣統三年旌表建坊入祠

周許氏 縣北拐屯許德之妹年十九歲適縣城周榮爲妻三十四歲夫故其長子鳳舞
年纔九歲次子鳳雙年七歲氏守節至七十二歲而卒清光緒三十二年奉旨旌表准
予建坊入節婦祠

史傅氏 縣城史相臣之母也青年夫故守節撫孤備受艱辛民國十年奉令褒揚賞給
節勵松筠匾額一方

楊劉氏 本邑劉尙武之長女適城南楊作桂爲妻青年守節合於褒揚條例民國十五

年得蒙奉天省長題贈匾額一方文曰貞松比操

薄王氏 城北葬山屯薄蔭廷之妻十九歲結婚二十七歲蔭廷病故遺子鴻陞纔二十
五日氏守節撫孤備受辛勞宣統三年奉 旨旌表建坊入節孝祠民國十六年邑人公
送柏節冰操匾額一方現年七十五歲壽臻大耄康強如昔人謂修德之報云

張馬氏 大夏窩堡張九思之妻年三十夫以疾卒遺子一女二皆在懷抱中公姑年邁
夫弟髫齡仰事俯畜皆氏任之或勸改嫁氏曰敗節求榮棄孤遺老乃賤妾耳吾弗爲也
遂任艱苦矢志靡他既而翁姑相繼逝世而夫弟成人旋又貴顯矣氏仍儉約如故不以
虛榮易其操現年八十七歲懷清履潔四十餘年已蒙旌表建坊云

王戴氏 縣南么台子武庠生王朝珍之繼室同縣仕宦戴廣珍之女也系出名門素嫻
禮教年二十五適王逾年夫故遺有前妻之子一方九齡氏則視同己出撫養踰恒惟不
溺愛姑息頗得仇毆教子之方冀其稍有成就也孰料斯子幼患癡癲病百葯罔效造就
未能揆之恒情鮮不失望而氏毫不退志以爲子既無成猶望生孫以善其後遂出重資

爲子聘婦果然天人感召不數年即舉一孫求仁得仁氏心大慰乃未幾癩子竟以斯疾夭亡矣氏雖疾首痛心祇以孀媳在旁強自忍抑乃携孀媳善護遺孫其愛孫之切一如鍾愛其子者然保抱看護移濕就乾均代孀媳親任之孫名恩選生而穎異氏雖愛護倍至但仍不稍驕縱及就學時孫或曠課氏必涕泣督責之因此孫亦知勉卒由黑山初高小學校升入奉天省立兩級師範學校畢業後以其成績優良任爲奉天省立第五小學校教員有孫如此皆氏教養有方所致綜其一身所歷環境窮奇悲慘皆爲人生所難堪者而氏卒能克服之豈僅一節可風哉荷蒙褒揚庶無愧焉

鈕賈氏 縣北孟屯鈕眞吉之妻民國二年夫以疾卒遺孤二且拋孀母老而貧時氏年纔二十二歲以其貧無餬口之資乃襁負其子沿門乞討得飯先奉孀姑然後分食兩兒剩有殘餘方肯自食日或半餐遑問飽乎如此數年孀姑棄養氏以乞討所得備棺禮葬時人不僅敬其節且皆嘆服其孝焉厥後兩子漸長成人氏則不稍姑息一令佃於家一令傭於外雖免乞討生活而已仍舊茹苦含辛日事操作如此者又二十年生計漸裕家

境稍有小康之象現在子媳賢孝含飴弄孫而賈氏享壽八旬以上荷蒙政府頒賜表彰狀以褒揚之宜也

劉王氏 縣東北公厥人十九歲于歸二十九歲而寡遺子五齡有姑年邁氏以一身担當事姑撫孤之責使不感覺姑無子子無父之苦者矢終身而不貳今氏年晉八旬既屬節孝可嘉又爲熙朝人瑞故於康德七年政府特予褒揚焉

張劉氏 縣南平房張鳳岐之妻十七歲適張二十三歲鳳岐病故一無所遺氏則矢志守節不爲夫族母黨所奪嗣以隻身無依遂以族侄爲嗣視如己出至於成立康德七年政府特予褒揚氏年已七十有九焉

王王氏 縣北趙屯人與同屯張喬氏先後于歸均於青年同遭夫故之慘二氏同病相憐互相砥勵矢志撫孤守節者各歷四十餘年現均年逾七旬可謂終身如一日矣今蒙政府各賜匾額以褒揚之宜也

王趙氏 縣北小夏窩堡王永惠之妻年三十夫故守節遺一子二女初依翁姑及夫兄

弟等同居度日尙不感覺若何痛苦未幾翁姑相繼逝世而夫兄弟等議析居時有勸其另醮者氏曰婦人從一而終古之禮也吾今有產可以撫孤安可棄孤他適而負亡人於地下耶從此男婚女嫁守志愈堅壽享七旬孫賢子孝鄉里欽其節義政府特予褒揚云

張劉氏 縣北韋城子張寶賢之繼室年二十適張撫有前房遺子一方三齡移濕就乾愛如己出旋自生二子一女仍愛前子如初行年三十而夫故乃矢志栢舟紡織自給且減衣食供給前子讀書以期無負亡夫之付託詎料前子及媳又相繼逝去遺有三男一女皆幼稚渴飲飢食胥惟祖母劉氏是賴蓋劉氏於撫孤兒之後又撫孤孫至於成立其節可欽其境可憫現年七十歲守節四十餘年備嘗艱苦節勵冰霜國家特予褒揚云

張任氏 縣南石甸子人十五歲于歸二十一歲夫以疾卒遺子一甫出襁褓房無一椽地無一壘雖有老翁在堂又染嗜好甚深室若磬懸炊爨時斷宗族戚友多有勸其改嫁者氏則一概謝絕之嘗謂吾夫祇此一子吾若嫁人子將何恃且再醮不義棄子不仁寧餓斃弗爲也遂埋頭茹苦蓰菰自甘上侍父翁下撫孤子無悔意亦無戚容及翁棄養子

已成人氏始稍免凍餒矣時年六十有四鄉人以其苦節可風遂請政府褒揚以彰節義云

劉戴氏 縣北孟家屯人十八歲于歸二十二歲守節家境貧窶井臼親操撫育子女至於成立現年六十有二守節四十餘年政府頒給匾額一方文曰節烈冰霜
姬安氏 縣東安家河人年十八歸同縣姬宗周爲妻奉事翁姑以孝聞乃翁病故助夫喪葬盡禮未幾宗周亦故遺子景春纔十一歲家極貧仰事俯蓄幾無所賴安氏則特紡績縫紉以求生活即以身担當事姑撫孤之責而不使其稍有缺望其姑李氏嘗語人曰吾有賢婦幾忘吾子之死矣聞者莫不欽其行而哀其志如有踵門行乞者雖無餘必與之其姑有疾延醫診治盡心服侍約必先嚐而後進中厠廁必淨以滌之病榻左右晝夜弗離卒以醫藥無靈姑竟不起及既沒則又喪盡其哀未嘗因貧而失禮也時子景春仍不更事寡母孤兒相依爲命以養以教其境愈苦然猶不令景春失學嘗謂吾夫止此一兒吾若不能教之成人何以慰夫於地下也惟以無力供讀爲憾因此景春讀書未

久即去習商而景春亦能善體母志於營利之中頗知思義尤重道德好施與凡由商業所得資財多半舉辦慈善事業果然天道福善不數十年善名大著家道以興康德二年安氏六旬晉一政府予以銀盾獎狀以褒揚之所謂苦盡甘來者是也

蕭宋氏 縣城蕭正己之妻於同治八年夫故守節時氏年僅二十八歲遺子三家復貧氏以翁姑已老子皆幼稚遂以養老送終撫孤成人爲堅固不拔之志果然天心佑善不數十年而老者瞑目幼者成材家道以興氏志克遂矣民國八年蒙大總統題贈匾額以示褒揚云

張齊氏 縣北新立屯張廷儒之妻年二十五夫故去遺子一僅三齡有姑在堂猶多病氏則上事病姑下撫幼子滿懷隱痛矢志靡他未一載而姑棄養喪葬盡禮人多賢之先是其姑好行善事嘗許修廟之願而有志未逮氏能仰承遺志選地興修娘娘廟一座開光演戲捨飯三天並捨良田百餘畝作爲永遠香火之資計共費用金額三千餘圓雖云修廟佞神不足爲法但以女流而能不惜鉅金爲姑了願則其孝思之純誠有足多者豈

僅一節云乎哉民國年間蒙大總統賞給匾額以彰節孝云

王吳氏 縣北韋城子人年十七適同村王治廷爲妻十九歲治廷病故遺有子女各一
仰賴翁姑撫孤度日尋翁姑亦相繼逝世吳氏於哀痛之中意謂翁姑雖皆見背猶賴有
子可依且可支持門戶也孰料其子竟於娶妻生子後又染疫以沒遺媳及孫一門孤寡
情何以堪但氏又以撫子之志移而撫孫並以孤詣苦心模範其媳卒使媳能守節孫已
成人而王氏不斬其宗悉由吳氏一身繫之滿洲建國崇尚節義政府特予褒揚以彰其
節云

楊劉氏 縣北新開河人年二十于歸楊文圃爲妻方二載文圃病故毫無所遺且家境
極寒自念吾如他適年邁翁姑將誰賴也乃矢志守節孝事翁姑以婦代子者五十年如
一日事聞於上部頒銀盾表彰狀及省頒褒狀各一事以彰節孝云

王趙氏 縣北小三家子王寶山之妻年二十五寶山病故遺子一方五齡雖有翁姑皆
將就暮且家貧無以資事畜趙氏則以針指所得擔當養生送死教子克家之責者數十

年無少怠現在家道小康子孫滿前而趙氏守節之功惡可湮沒當蒙政府頒賜匾額以褒揚之

陳史氏 縣北楊屯人佚其夫之名年二十八夫故守節子幼姑老處境極艱氏則以婦代子以母代父卒使其姑若子若不知有無子無父之苦者數十年如一日因此鄉里稱賢公請政府褒揚焉

孟程氏 縣北孟屯人失其夫之名於二十一歲嫁爲孟家婦至二十四歲即夫故守婦矣既無子女終鮮兄弟而翁姑僅存復老且貧人皆爲婦悲竊意其不能久守也詎料程氏惟以翁姑老而貧愈不忍拋棄之遂以決心堅守苦節日侍翁姑左右而未嘗厭貧未幾翁姑相繼故去而守節之志仍不稍變但氏僅剩一身形影相弔乃過族人之子以承其祧俾免斬宗絕嗣焉康德七年政府特准立碑建坊以示表彰云

袁梁氏 縣東杜家屯人年十八嫁與袁振鵬爲妻未數月振鵬因擊匪殞命梁氏自認命薄矢志靡他孝事翁姑和睦妯娌迄今三十餘年冰霜其心松筠其節鄉里皆以賢孝

稱之先是夫弟以襁褓之子爲梁氏嗣氏則欣然接受哺養愛護視如己出稍長教以義方嘗語人曰守節難守節而嗣他人之子爲尤難今吾密減個人費用務使嗣子得受中等以上教育俾繼吾夫已絕之傳則夫雖不及見亦可稍慰於九泉也語重心長其情可哀若袁梁氏者不僅以節稱且堪以義傳也

張張氏 縣北小礪子人年十七于歸本屯張國政爲妻至三十一歲國政病故遺幼孤二家計艱窘衣食不給張氏茹苦含辛保抱雙孤紡織度日經四十餘年之苦勞卒達撫孤成名之志願現在子孫繞膝家道小康鄉黨稱賢輶軒訪采若張氏者亦可以風矣

梁李氏 縣東大興庄梁寶山之兒媳十九歲于歸二十四歲夫故守節遺一子方三齡翁姑在堂年事皆老有夫弟一亦幼稚氏則誓守苦節獨操家務使老幼各得其所而已貶抑自甘也厥後翁姑相繼棄養氏即領導夫弟與子刻苦讀書至於成立梁氏之不墮其家者氏之力也計其守節三十餘年冰霜自勵潔白無瑕鄉里咸敬重之

三、烈女

蔣銀珠 縣東小張窩堡蔣尙林之女母王氏兄早逝姊妹皆適人獨女以其父母老而獨誓終身不嫁事父母以終天年突於民國二十年十二月初八日夜間有賊數十破扉入室時其妹適歸寧與女同榻隅坐賊艷其美將犯之女急與妹互抱賊不得逞臨之以槍曰從我則生不然死矣女曰寧死不能從也遂被戕賊去家人謀救之女曰吾以清白遺父母得死所矣言既而瞑嗚呼烈矣卒年二十有六大同元年政府特賜匾額銀盾以旌表之並爲勒碑以紀其烈

四、義舉

魏玉奎 字璜璧縣城人於清光緒二十九年捐貲爲本城保安宮贖地六天七畝立石載明專供常年僱人拾字紙平道路掩埋枯骨之用有餘則作道士香火資是年復在城

內創設義塾一處招收貧家子弟無給來學至民國初年始因事停止民國八年公復請准教育當局以自己房舍設立高初兩級小學校不收租金對於貧寒子弟之就學者仍不收受一切費用至十一年始歸官辦改名爲黑山縣立第二高等小學校但其始基固爲公所創成者時值本縣奉令創設縣議會推公爲議長關於地方應辦事務無不竭力爲之前後數年所得薪金絲毫不入於家悉充地方公益之用又以古蹟名勝理宜保存見有殘破庵觀寺院必爲之補飾修葺其中十有八九爲自己出資非僅一新本縣境內之上帝廟龍興寺已也即遠如北鎮之文廟魚泉寺及錦縣境內之古剎荒祠無不傾囊佈施使其完整至今重修之碑尙巍然入於遊人之眼簾莫不歎其保存古蹟之苦心也尤其在虎壕鐵路興修之時發掘無主坟墓數百塚公皆代爲購棺遷移使死者得所最令人不忘者即本城南門外原有牧養一大段爲本城耆舊王元成先生所遺留供給附近村民取土牧畜及貧無墓地者葬墳之用年僅納課數十畝則其浮多地數固十百倍不止也光宣以降政府乃有清賦浮多首報檢舉之令地方遂有報領此段浮多作爲私